

玉函山房輯佚書

平原君書一卷漢朱建撰建楚人故淮南王黥布相
布欲反嘗諫止之布不聽漢既誅布聞建諫之高祖
賜建號平原君漢書有傳藝文志儒家平原君七篇
注朱建也按建本傳只記其救辟陽侯一事與梁孝
王刺爰盜事敗鄒陽爲之至長安說竇長君絕相類
要皆戰國之餘習乃班志於鄒陽入從橫家於平原
君則入儒家必其佚篇多雅正語然今不可見矣第
取本傳中說閱籍孺一篇附載事蹟聊備觀覽云爾
歷城馬國翰竹吾甫

平原君書

漢 朱建 撰

說閻籍孺

君所以得幸帝天下莫不聞今辟陽侯幸太后而下
吏道路皆言君讒欲殺之今日辟陽侯誅旦日太后
含怒亦誅君君何不肉袒爲辟陽侯言帝帝聽君出
辟陽侯太后大驩兩主俱幸君君富貴益倍矣於是
閻籍孺大恐從其計言帝帝果出辟陽侯

漢書
本傳

附事蹟

漢書曰朱建楚人也故嘗爲淮南王黥布相有罪去復事布布欲反時問建建諫止之布不聽聽梁父侯遂反漢旣誅布聞建諫之高祖賜建號平原君家徙長安爲人辯有口刻廉剛直行不苟合義不取容辟陽侯行不正得幸呂太后欲知建建不肯見及建母死貧未有以發喪方假資服陸賈素與建善乃見辟陽侯賀曰平原君母死辟陽侯曰平原君母死何乃賀我陸生曰前日君侯欲知平原若平原君義不知君以其母故今其母死君誠

厚送喪則彼爲君死矣辟陽侯廼奉百金稅列侯
貴人以辟陽侯故往賻凡五百金久之人或毀辟
陽侯惠帝大怒下吏欲誅之太后慙不可言大臣
多害辟陽侯行欲遂誅之辟陽侯困急使人欲見
建建辭曰獄急不敢見建乃求見孝惠幸臣閼籍
孺說之云云帝果出辟陽侯辟陽侯之囚欲見建
建不見辟陽侯以爲背之大怒及其成功出之大
驚呂太后崩大臣誅諸呂辟陽侯與諸呂至深卒
不誅計畫所以全者皆陸生平原君之力也孝文

時淮南厲王殺辟陽侯以黨諸呂故孝文聞其客
朱建爲其策使吏捕欲治聞吏至門建欲自殺諸
子及吏皆曰事未可知何自殺爲建曰我死禍絕
不及乃身矣遂自剄文帝聞而惜之曰吾無殺建
意也乃召其子拜爲中大夫使匈奴單于無禮罵
單于遂死匈奴中

劉敬書一卷漢劉敬撰敬齊人本姓婁氏高祖以都
秦之計出婁敬言婁者劉也賜姓劉氏拜爲郎中號
曰奉春君後封建信侯事蹟詳漢書本傳漢藝文志
儒家劉敬三篇隋唐志不著目其文散見本傳中今
據錄之陳仁子論都秦以爲使後世不務德而務險
者得敬言以爲藉口得爲至論乎司馬溫公論和親
以爲冒頓視其父如禽獸而獵之矣有于婦翁建信
侯之術固已疎矣況魯元已爲趙后又可奪乎然則
敬之爲策大抵權宜救時之計然漢兼王霸以爲家

法則當日之列於儒家者蓋有由已歷城馬國翰竹

吾甫

劉敬書

漢 劉敬 撰

說都秦

漢五年戊隴西過雒陽高帝在焉敬脫輓輅見齊人
虞將軍曰臣願見上言便宜虞將軍欲與鮮衣敬曰
臣衣帛衣帛見衣褐衣褐見不敢易衣虞將軍入言
上上召見賜食已而問敬敬說曰陛下都雒陽豈欲
與周室比隆哉上曰然敬曰陛下王天下與周異周
之先自后稷堯封之邠積德業善十餘世公劉避桀

居幽大王以狄伐故去幽杖馬箠去居岐國人爭歸之及文王爲西伯斷虞芮訟始受命呂望伯夷自海濱來歸之武王伐紂不期而會孟津上八百諸侯遂滅殷成王卽位周公之屬傅相焉廼營成周都雒以爲此天下中諸侯四方納貢職道里鈞矣有德則易以王無德則易以亡凡居此者欲令務以德致人不欲阻險令後世驕奢以虐民也及周之衰分而爲二天下莫朝周周不能制非德薄形勢弱也今陛下起豐沛收卒三千人以之徑往卷蜀漢定三秦與項籍

戰滎陽大戰七十小戰四十使天下之民肝腦塗地
父子暴骸中野不可勝數哭泣之聲不絕傷夷者未
起而欲北隆成康之世臣竊以爲不侔矣且夫秦地
被山帶河四塞以爲固卒然有急百萬之衆可具因
秦之故資甚美膏腴之地此所謂天府陛下入關而
都之山東雖亂秦地地可全而有也夫與人鬪不掄
其亢拊其背未能全勝今陛下入關而都按秦之故
此亦掄天下之亢而拊其背也上疑未能決及留侯

明言入關便卽日駕西都關中

漢書
本傳

和親

冒頓單于與彊控弦四十萬騎數苦北邊上患之問
敬敬曰天下初定士卒罷於兵革未可以武服也冒
頓殺父代立妻羣母以力爲威未可以仁義說也獨
可以計久遠子孫爲臣耳然陛下恐不能爲上曰誠
可何爲不能顧爲奈何敬曰陛下誠能以適長公立
妻單于厚奉遺之彼知漢女送厚蠻夷必慕以爲閼
氏生子必爲太子代單于何者貪漢重幣陛下以歲
時漢所餘彼所鮮數問遣使辯士風諭以禮節冒頓

在固爲子壻死外孫爲單于豈曾聞外孫敢與大父
亢禮哉可毋戰以漸臣也若陛下不能遣長公主而
令宗室及後宮詐稱公主彼亦知不肯貴近無益也
高帝曰善

徙民

敬從匈奴來因言匈奴河南白羊樓煩王法長安近
者七百里輕騎一日一夕可以至秦中新破少民地
肥饒可以實夫諸侯初起時非齊諸田楚昭屈景莫
與今陛下雖都關中實少人北近胡寇東有六國彊

族一日有變陛下亦未得安枕而臥也臣願陛下徙
齊諸田楚昭屈景燕趙韓魏後及豪桀名家且實關
中無事可以備胡諸侯有變亦足率以東伐此彊本
弱末之術也上曰善

並同上

至言一卷漢賈山撰山潁川人祖父祛故魏王時博士弟子山受祛學嘗給事潁陰侯爲騎文帝時數上書言事具詳漢書本傳漢藝文志儒家賈山八篇今只傳至言一篇若諫文帝除鑄錢訟淮南王無大罪言柴唐子爲不善三疏當在八篇中而世不傳本傳全載此篇之文據錄爲卷卽以至言標目書言治亂之道借秦爲喻眞西山稱其爲忠臣防微之論而以陳善閉邪許之王伯厚謂山之才亞于賈誼其學粹于鼂錯乃班書以涉獵書記不能爲醇儒斷之豈其

至言

然乎歷城馬國翰竹吾甫